

Deontologiya – mazkur atama yunoncha “deon” — “burch” va “logos” — “ta’limot” soʻzlaridan kelib chiqqan boʻlib, u insonning axloqiy qoidalar va burchlarga amal qilishi zarurligini, bu qoidalarning ijtimoiy yoki shaxsiy oqibatlaridan qat’i nazar, asosiy me’yor sifatida qoʻyadigan axloqiy nazariyani anglatadi¹. Mazkur yondashuvda amalning natijasidan koʻra, uning oʻzi va belgilangan qoidalarga qanchalik muvofiq ekanligi asosiy mezon hisoblanadi. Shuningdek, inson vijdoni, burch va mas’uliyat tuygʻulari markaziy ahamiyat kasb etadi. Xususan, jurnalist har qanday vaziyatda ham yolgʻon ma’lumot tarqatmasligi, faktlarni buzmasdan va turli maqsadda tahrirlamasdan yetkazishi kerak. Hatto ma’lumotni “ijobiy maqsad”da oʻzgartirish imkoniyati tugʻilgan taqdirda ham, deontologiya nuqtayi nazaridan bu holat qoʻllab-quvvatlanmaydi. Masalan, jinoyat haqidagi reportajda voqea tafsilotlarini auditoriyaga kuchliroq ta’sir oʻtkazish maqsadida tahrirlash mumkin boʻlsa-da, jurnalistning burchi – ma’lumotni xolis, aniq va ishonchli tarzda taqdim etishdan iborat.

¹ Xasanova D. The principles of deontological ethics // *Academicia Globe Inderscience Research*. 2024. –P. 56-59.